

元史新編

元史卷十七

列傳三

太祖平服各國

金哀宗有言蒙古滅國四十以及於夏夏亡以及於我我  
亡必及於宋然蒙古源流載太祖將征唐兀部時曰承上  
帝之命駕馭天下十二強汗平定諸惡劣小汗則四十國  
中除各小部落外其大部落亦不過十二今可知者白韃  
塔爾部泰赤烏部蔑爾乞部一作蔑里吉札木合部克烈部乃  
滿部回鶻部西契丹部即回回部爲契丹所據亦名西遼北印度部阿羅  
思部欽察部阿速部又所收服者東遼國即耶律東夏萬  
奴國凡十四大國皆在伐唐兀部之前唐兀部即西夏元史不仿  
宋史立南唐吳越諸世家之例無削平各國之傳故讀史  
者茫然於西北疆域而本紀所書兵事亦莫測其道里方

位所在今參攷諸書創立數傳以爲讀元史之先導

東北諸部

塔爾

蔑里吉

泰赤烏

東遼

東夏

初金旣滅遼其部落遺民在混同江東北者謂之東北路契丹在混同江西北嫩江東北者謂之西北路契丹元初耶律雷哥以遼遺民破東京歸於元者東北路契丹也金大定初耶律窩斡以山前山後羣牧起兵陷韓州圍臨潢攻泰州徧北京及明昌間契丹羣牧德壽等據信州叛建元身聖眾四十萬丞相完顏襄討平者皆西北路契丹也其白嫩江以西則爲沙陀舊族分白黑二韃靼白韃靼在潢河之北盧朐河之東北舊史作怯綠連河卽克魯倫河謂之北阻鞞金明昌間遣丞相完顏襄攻阻鞞於龍駒河龍駒卽盧朐解大軍之圍又遣一軍出西北路以邀阻鞞而自帥兵出臨潢進

掘山嶺卽用步卒穿濠築障起臨潢左界北京路以爲阻

塞而用乣部二十七族以戍之者

乣部古奚種介  
鞑與漢之間

白鞑鞑

蒙古也黑鞑鞑在盧朐河之西北斡難河之間

今蒙古車  
臣汗地

在金世未嘗爲患而元太祖起其地收服旁近北阻鞑部

又聯絡二十七乣部爲鄉導以攻中國於是白鞑黑鞑生

鞑熟鞑合爲一部及耶律畱哥以遼東來歸於是東西契

丹魚皮等族亦合爲一部蓋西北部落興衰無定此部強

則各部數千里爲之驅使弱則又役屬於鄰部而地蹙不

過百里數百里是以大金國志稱蒙骨部在女眞之東北

亦謂之蒙兀部人不火食夜中能視以鮫魚皮爲甲可捍

流矢叛於天會天眷間蓋白鞑部強盛時東方漁獵部與

西北游牧部合而爲一故金人紀載多以東契丹爲蒙骨

其實二部東西相望數千里其白韃蒙古本地東控臨潢南接靜州而止初無魚皮爲甲之事且一游牧一漁獵風俗判然不同舊史混殽不明而金元所以興亡遂不著於後世今攷其收服東北部落一白黑韃二東遼三完顏萬奴東夏但白黑韃收服在蒙古未興以前東遼東夏收服在蒙古強盛以後事非一役地則相連故今以三部首冠於前使知金末根本先撥外讐始啟

據金史大金國志及蒙韃備錄

成吉思初年伏部三曰塔爾部曰蔑里吉部曰泰赤烏部塔爾部者曾害太祖之從曾祖俺巴海汗者也初捕魚兒海有兀兒寶溫河居河東者爲白韃塔爾部蔑里吉部居河西者爲黑韃泰赤烏等部俺巴海則黑韃汗也嘗以失約獲罪於金後渡河嫁女於塔爾部爲其部人執送金國

從兄子忽圖刺嗣位往復其仇連十三戰時太祖父烈祖  
雅速該在陳有功授千戶逾數歲烈祖復爲塔爾部人所  
害故太祖與塔爾部世仇蔑里吉部者爲訶額倫太后初  
嫁之國中途爲烈祖所奪其部人嘗思報復泰赤烏卽俺  
巴海之子欺太祖孤幼奪其部眾及長成人忌其英猛以  
兵圍索於山林九日卒獲太祖以歸械諸營中赤老溫之  
父憐而逸之遯還漁獵於盧朐河側黎明有老嫗聞地動  
聲疑泰赤烏之軍復至急呼太祖母訶額倫太后闔家急  
奔布爾罕山惟弘吉刺夫人無馬被虜則白韃部蔑里吉  
之軍非泰赤烏軍也賊退太祖出山曰吾子孫世世當祭  
布爾罕山乃灑馬湏九頓首而去故此三部皆與太祖爲  
仇敵於是兄弟赴愬於克烈部王罕及族人札木合請兵

二萬往攻蔑爾乞部奪回弘吉刺夫人金承安五年金國

遣丞相完顏襄

祕史作王京

討塔爾部之叛塔爾部兵敗北走

太祖欲報父仇乃約克烈部脫里王罕邀擊於納刺禿什

圖之野獲大珠及金銀縑車各一獻於金完顏襄奏聞金

賜帝官號曰察兀圖魯漢語招討使也帝既攻塔爾部禽

其四奧魯復欲坑其四種人以泄憤塔爾部回軍皆據險

死拒力攻破之猶人懷一刃戰死復徵兵於所屬局爾勤

部不至反劫掠我輜重於哈澧海因回軍竝滅之於是族

人勇健者皆服辛酉年泰赤烏與札木合合兵來攻帝再

敗之於斡難河遂盡有泰赤烏之眾威德日著鄰部慕義

多來降札木合降於王罕泰赤烏蔑里吉二酋皆奔乃滿

乙丑年太祖既破克烈部而蔑里吉部先降復叛遣將破

之其酋子忽都遁去命速不台以鐵車追之曰此帶勒之

馬中矢之鹿必禽之而後已憶曩日蔑里吉兵逐我繞布

爾罕山三市此怨何可忘也竟獲忽都於垂河是爲太祖

初年吞并幹難河怯綠連河諸白黑韃近部之始據本紀及元秘

史其東遼諸部則太祖初年未嘗親征其後遣將取之者

半耶律留哥率以歸附者半初東西契丹者遼之遺部散

處混同江以北世受徵調於金金世宗大定初西北路契

丹因海陵煬王伐宋盡徵其部丁壯以行東契丹恐國空

虛爲鄰部所虜羣起怨叛山前山後羣牧皆應之眾至數

十萬陷韓州據咸平沿盧朐河而西將歸於西遼大石旣

又圍臨潢改元僭號至大定三年始定是爲一叛金章宗

明昌閒屢遣左丞相夾谷清臣右丞相完顏襄用兵東北



盡徵諸乂部北阻鞞會兵臨潢竝招募上京西京北京東  
京咸平臨潢漢軍詔臺省百官集議邊事問攻守之計而  
皆不書敵寇之名故大金國志謂章宗枉誅鄭王允蹈其  
子愛王大辯起兵遼東後修史者深諱其事不敢指實至  
金衛王大安初年大辯已死其子三大王雄嗣立復聯北  
部內犯京師戒嚴敕沿邊百姓不得傳說軍事金盡失和  
龍以北始興王之地是爲再叛其時太祖方與漠北諸部  
戰尙未攻金及漠北盪平太祖稱帝北阻鞞亦附於蒙古  
知金國內釁始於衛紹王三年起兵攻燕因北部爲鄉道  
入居庸破畿輔分兵取遼西之地時太祖稱帝已六年矣  
三大王雄旣失北阻鞞之援乃去帝號漸衰弱金始復經  
略遼東乃下令遼民每戶以二女眞戶夾居防之明年壬

申

太祖七年金衛王第四年也

耶律畱哥起兵隆安韓州數月眾十餘

萬營帳百餘里遼東大震

金遣胡沙帥軍數十萬討之爲

畱哥及我援兵所破

金史衛紹王本紀三年大元兵來征遣參知政事胡沙知樞密院事胡沙

虎備邊案此時金北受元攻京師危如累卵尙能興六十萬攻遼之師乎但史言衛王之書記載殘缺而孟琪蒙驍備錄亦有胡沙五十萬眾敗於蒙古之事姑闕疑焉畱哥自立爲遼王九年甲戌金

主遣青苟招降不從復遣宣撫使完顏萬奴領軍四十餘

萬攻之

金宣宗貞祐二年南遷汴京三年三月諭遼東宣撫使蒲鮮萬奴選精銳屯瀋州廣寧侯進止卽此

事但決無四十萬之理或疑萬奴卽三大王雄金至是始撫而用之也畱哥逆戰於歸仁縣

北河金兵大潰

宣宗紀貞祐三年五月中都被十月遼東宣撫使萬奴遣使來報敗畱哥之捷與此

大異則金史所謂宣宗之世捷報多虛者也

萬奴收散卒奔東京於是畱哥盡

有遼東州郡遂都咸平號中京敗金左副元帥耶律都之

兵十年乙亥

金宣宗貞祐三年

畱哥破東京眾勸其稱東帝不許

與其子來朝於太祖未歸而其國爲部下所據五載易四  
主留哥始引蒙古契丹高麗及東夏國軍十萬討平之時  
混同江以南爲完顏萬奴所據號東夏國留哥止據混同  
江以北東樓西樓之地自有傳據金史大金國志耶律留哥傳東夏國者

金遼東宣撫使完顏萬奴也

各紀傳作蒲鮮萬奴惟木華黎孫塔思傳作完顏萬奴今

從

金自明昌以後遼東均據於愛王父子連年用兵分見

紀傳衛紹王三年耶律留哥自立於遼東宣宗貞祐三年  
乙亥三月命遼東宣撫使萬奴選精銳屯瀋州廣寧以候  
進止時留哥叛據自立已五年金方外闕蒙古內生變逆  
不暇規遼東至是南遷汴京始有宣撫之命五月燕都陷  
十月萬奴遣使報敗留哥之捷或言軍實敗績走保東京  
旋僭稱天王國號大真兀良合台傳作女真改元天泰時金已遷汴

遼西盡爲元有與遼東隔絕不能問金主嘗歎曰人不易  
知吾以遼東專委萬奴而效尤變亂如是旣而雷哥進攻  
東京陷之萬奴率眾十餘萬遁入海島又明年丙子太祖  
年冬十月萬奴來降以其子帖哥入侍及雷哥所部內亂  
萬奴復襲據東京僭稱東夏其地南接高麗北界混同江  
與雷哥東西樓接壤通聘故戊寅年曾遣其元帥胡土將  
兵助雷哥攻咸舍太宗五年癸巳二月以高麗請降而萬  
奴不服命皇子貴由及諸王按赤台討之九月東夏平諸  
王班師命太弟別里古台鎮守遼東萬奴割據自乙亥至  
癸巳凡十九年其本紀列傳又有木華黎石抹耶先哲伯  
等於太祖七年壬申襲破東京之事與雷哥傳不符蓋誤  
以北京爲東京辨詳石抹耶先傳

據本紀及金史及  
耶律雷哥等傳

漠北諸部

札荅刺

克烈

乃滿

黑韃部與太祖始睦後讐者二曰札荅刺部曰克烈部札荅刺部酋札木合者太祖疏族幼微時相與嬉游親若兄弟所謂按荅者也克烈部酋王罕者名曰脫里受金封王酋部人呼酋曰合罕即可汗之稱故統稱王罕初脫里少時疏忌宗族曾爲其族叔菊爾汗攻破走合刺溫山僅百騎太祖之父烈祖雅速該救之奪還其部眾約爲兄弟太祖之父執也太祖旣冠有室以弘吉刺氏所贄見舅姑之黑貂裘往獻王罕王罕爲招合舊部始稍有土馬王罕又約札木合助帝討蔑爾乞部奪還弘吉刺夫人於是帝與札木合合營札木合部眾數萬太祖盡交其豪人心多陰附年餘札木合疑忌太祖太祖徙帳宵去諸部人多棄札木合

而從之至桑沽爾河闊闊納活兒海子其議立帝爲成吉思合罕使人告於克烈札木合二部其後札木合之弟與帝麾下爭牧馬於薩里河被射死札木合以爲怨於是泰赤烏遂約札木合部三萬人越阿刺烏嶺來攻帝亦聚十三圍內人三萬迎戰不利退至斡難河札木合般掠而去明年辛酉泰赤烏復與合荅斤部引吉刺部散只兀部多魯班部塔爾部亦乞列思部火魯刺思部按赤部察罕部共十一部亦立札木合爲合罕於額古聶河欲攻太祖及王罕指河岸誓曰凡我同盟有泄此謀者如岸之摧如林之伐誓畢共蹙岸斫林集士馬來侵帝帳下士得其謀以告帝卽與王罕合軍拒之遷輜重於他所而倚阿蘭塞爲壘大戰闕奔壇之野敵軍使神巫致風雪欲乘勢進攻及

戰雪滿溝澗天忽反風帝軍乘之札木合秦赤烏軍多墜  
澗中遂大潰十一部咸叛掠去王罕軍追札木合帝軍追  
秦赤烏皆破之既而王罕與諸弟內鬩諸弟逃乃滿乃滿  
東部布魯汗卽秦陽汗之兄也以兵攻王罕王罕部眾復潰散多  
來歸克烈部勇士札合敢布亦來降王罕走西夏回鶻回  
回三國中道糧絕捋羊乳而飲刺橐駝血而食帝遣使自  
古泄爾海迎至怯綠連河資以貲財士馬招還其部落於  
是稍振王罕又自攻蔑里吉部大獲而還旋爲乃滿東部  
布魯汗所襲虜其子婦而蔑里吉部舊降者亦乘間叛去  
王罕復求援於帝且借其四良將帝遣木華黎博爾朮博  
爾忽赤老溫等赴之大敗乃滿布魯汗之眾盡奪回所掠  
帝弟合薩爾亦助敗乃滿兵於忽闌山積尸以爲京觀於

是王罕與帝約爲父子誓於土刺河黑林王罕子桑昆

史

作奔刺合案桑昆者遼金時詳袞之稱乃官名非人名也一作鮮昆又作先髮性猜忍帝請與爲

昏姻不許而札木合在其軍中復日夜離間於桑昆曰我與君是白翎雀寒暑常在鐵木真是鴻雁遇寒則南飛就暖耳彼常通信於乃滿其可保乎桑昆惑其言說父王罕請圖之王罕不許謂我身賴鐵木真而存今須髮已白惟覲安腹柰何聽巧言寡信之札木合乎桑昆固請不已王罕已耄曰任汝爲之母貽吾憂於是桑昆遣使許昏以其女妻帝長子且請帝往飲布渾察酒華言許親酒也帝率十騎將赴之爲部下蒙力克阻其行桑昆計不行遂議潛師來襲以軍士聽札木合調度札木合曰鐵木真部下善戰者惟芒忽兀魯二軍可令朱力斤部勇士一千人前衝



之再以董哀部火力失烈門部繼衝之取後乃以護衛中軍爲應援會札木合夜醉漏言其部下圍人泄其謀於我圍人帝急移輜重於溫都爾山調軍守阿蘭塞眾未集而王罕軍已大至帝軍倉卒大潰翼日部眾求得帝於班居河側飲河水已誓眾曰他日敢忘此患難者有如河所謂飲渾水十九功臣也整兵再戰分兩隊初遇其前鋒再遇桑昆父子親軍桑昆親搏戰射中其額大敗之其部眾多來降札木合謀殺王罕弗克奔乃滿帝駐軍董哥澤遣使責王罕父子負德之罪竝詰兵端曰君昔爲族人所逐窮迫無歸吾父助兵敗君仇族於河西收其土地士馬以與君其功於君一也君爲乃滿兵所攻西奔日沒處我遣人迎還比至又爲蔑里吉所逼我遣兄弟往拒之又歷取諸

部羊馬輜財以濟君匱其功於君二也君不告我往掠蔑里吉部大獲而還未有一毫遺我我征多魯班等五部如海東青之於鷺雁見無不獲獲則必致於君其功於君三也我與君共拒乃滿日暮對陳君夜不我告然炬於林而潛軍移去及輜重爲乃滿襲虜我遣四將奪還爾士馬重立爾庭帳其功於君四也今無端反戈於我背天違誓其謂之何王罕聞言自責其子竝刺血盛皮囊遺帝爲誓而桑昆則忿然曰事勢至此惟有竭力角戰爾勝則并我我勝則并爾尙何多言爲使者歸述其語且言王罕父子方張撒金帳置酒高會無備時帝弟合薩爾妻子被俘在王罕所脫身來歸會於河上帝乃令合薩爾佯遣使以迎擊爲名而潛師隨其後中途約弘吉刺別部亦乞烈族以行

晝夜兼進逾額爾溫都山突襲其帳圍攻三晝夜盡降其  
眾惟王罕父子遁免以其部下有合荅赫者能力關脫其  
主帝義之赦隸麾下以克烈部眾分賞親軍又收王罕撒  
金帳金器皿宿衛歌者賞克烈部圍人泄謀告祕之功王  
罕走聶坤河爲乃滿部人所殺桑昆由西夏走龜茲國爲  
其奴殺之來降帝斬其奴以徇乃大獵鐵麥該川申約束  
號令振旅而還此太祖初年吞并怯綠連河左右黑韃兩  
大部之始據本紀及元祕史乃滿部者一作乃蠻一作柰曼居土刺河之西  
一作土拉一作土剌鄂爾昆河左右依沆海山爲帳一作杭卽唐  
回紇建牙之所古北匈奴所庭也自回紇徙帳火州後卽今  
土魯番地古高昌國乃滿卽居之控弦十餘萬世雄漠北  
回紇轉音爲畏吾至秦陽汗惟知射獵鷹犬不習軍陳舊有兩汗分主東西

二部泰陽汗聞帝敗其東部布魯汗滅克烈部勢日強盛遣使約東方白韃部夾攻蒙古瓜分其地白韃酋阿剌忽思執其使來告甲子歲

金章宗泰和四年

太祖大會於鐵麥該川

議西攻乃滿羣臣以方春馬瘦宜俟秋高皇弟別里古台曰乃滿恃強而言驕攻之宜乘其不備且敵馬成羣可奪而用之大軍猝至其眾易潰何以秋爲遂以四月十六日祭纛啟行溯怯綠連河岸而上初泰陽汗聞克烈部王罕死遣人取其首至鼓樂祭之首忽笑眾謂不祥又犬吠不時有敗聲至是乃滿合蔑里吉部克烈部塔爾部土魯班部哈答斤部散只兀部各降眾屯於沆海山勢甚盛其臣下曰我諸將惟科克薛薩布知兵今已年老軍令久弛眾無紀律非蒙古敵也科克薛薩布曰聞蒙古遠來馬瘦請

內徙部民逾金山避其銳縱燒草地誘敵深入人馬疲困而後以勁騎回擊之庶可取勝泰陽汗將從之其子屈出律曰自我先世以進戰退戮爲軍令馬尾人背不使敵見今我汗婦女耳畏敵示弱何以國爲泰陽汗怒遂渡塔米爾河而陳使諸軍盡聽札木合調度時帝軍抵土刺河縱火布滿山谷爲疑兵乃滿哨軍以敵眾勢盛告泰陽汗懼乃與札木合晨登納胡嶺以望敵問曰彼前驅者何人曰此鐵木真四先鋒曰哲伯曰忽必雷曰赭勒蔑曰速不台皆萬人敵今日如獵犬脫索歡奔而前也泰陽汗遂麾軍稍退依山而陳又問後軍簇擁如山者何人對曰此兀魯部芒忽部其旗幟一花一黑攪戰萬眾中隊伍不亂者也泰陽汗又傳令移眾半山而立又問兩人一當前一統士

馬隨後進者何人曰前卽鐵木真身先萬眾後卽其弟合  
薩爾披三重甲小曳弓五百步大曳弓九百步臨陳其怒  
如雷者也秦陽汗益懼遂以麾下盡保山顛札木合知乃  
滿非蒙古敵自率所部先遁遣人來告以敵軍無鬪志可  
急乘之帝遂大戰至晡乃滿諸軍皆潰夜走絕險進軍圍  
之墜崖墜死者無數翌日遂禽秦陽汗惟其子屈出律以  
數千騎遁至阿勒台山卽金山也帝盡收其部眾兼追禽  
其兄布魯汗遂滅其國是秋蔑里吉部復叛據台合勒山  
寨帝令赤老溫之兄沈伯攻之而自追其酋於金山過冬  
明年春踰阿來嶺適乃滿酋屈出律與蔑里吉合軍拒戰  
復大破之射殪蔑里吉之酋惟其子忽都與屈出律西走  
回回帝乃旋軍而令哲伯速不台西追二酋諭以必盡賊

乃反用降部幹亦刺爲鄉道至回鶻之耶爾的石河射殺忽都蔑里吉部黨略平惟屈出律奔回回西契丹於是金

嶺以北突巴思部吉利吉思部

一作乞爾吉思

先後來降以白海

青黑貂鼠來貢其地在沆海山以北鄂爾昆河下游凡什必爾部以南林木中部落皆收服又命博爾忽及孛羅勒征廓里突馬部孛羅勒以三騎先進暮入深林被殺乃命多爾伯申助博爾忽征之盡虜其眾乃滿旣滅札木合亦爲人執獻帝以其在敵軍中屢泄王罕乃滿之謀不失故舊誼赦隸宿衛札木合自知前事反覆且慮帝雄猜終不相容曰汗善用人故成功我以失人心故敗然我不死汗寢不安固請就死遂自殺帝命以禮厚葬之是爲太祖中年吞并漠北黑韃全部之事

據本紀及元祕史

東契丹耶律畱哥

耶律畱哥契丹人仕金爲北邊千戶太祖起兵朔方金人疑遼遺民有他志下令遼民每戶以二女眞戶夾居防之

畱哥不自安太祖七年壬申

壬申爲衛紹王四年改元崇慶蒙古兵已於元年入居庸

時太祖已稱帝於斡難河七年矣南遷錄言愛王卒於遁衛紹王元年其子雄嗣位是爲三大王至是已三年矣

遁

至隆安韓州糾壯士剽掠其地州發卒追捕畱哥皆擊走

之因與耶的合勢募兵數月眾至十餘萬推畱哥爲都元

帥耶的副之營帳百里威震遼東太祖命按陳那衍渾都

古行軍至遼遇之畱哥乃率所部會按陳於金山刑白馬

白牛登高北望折矢以盟按陳曰吾還奏當以征遼之責

屬爾金人遣胡沙帥軍六十萬號百萬來攻畱哥畱哥亟

馳請援帝命按陳孛都歡阿魯都罕引千騎赴之畱哥與



金兵對陳於迪吉海子以姪安奴爲先鋒橫衝胡沙軍大敗之以所俘輜重獻帝召按陳還而以柯特哥副雷哥屯

其地八年癸酉

癸酉爲金衛紹王五年九月被獻宣宗立改元貞祐蒙古木華黎兵侵金圍燕拔河

東河北諸州郡

三月眾推雷哥爲王立妻姚里氏爲妃以其屬耶

斯布爲郡王坡沙僧家奴耶的李家奴等爲丞相元帥尙書統古與著撥行元帥府事國號遼九年甲戌金遣使青苟招降不從雷青苟不遣金主怒復遣宣撫完顏萬奴領軍四十餘萬攻之雷哥逆戰於歸仁縣北河上金兵大潰萬奴收散卒奔東京安東同知阿憐遣使求附於是盡有遼東州郡遂都咸平號爲中京金左副元帥耶律都以兵十萬來攻雷哥拒戰敗之十年乙亥雷哥破東京

乙亥金宣宗貞祐三年

五月中都破蒙古入燕攻金潼關不克

耶斯布等勸雷哥稱東帝雷哥

曰鄉者吾與按陳那衍盟願附大蒙古國削平疆宇今背盟樹敵逆天不祥眾請愈力乃稱疾不出潛與其子薛闡奉金幣九十車金銀牌五百至行在入覲帝大悅曰漢人先納款者前惟劉伯林然伯林迫於重圍而來未若畱哥仗義效順也其舉畱哥所獻以白氈陳之於天七日而後納諸庫命賜金虎符仍封遼王又問戶籍幾何對曰六十餘萬帝曰可發三千人爲質朕遣蒙古三百人往取之初畱哥破東京時蒙古將柯特哥奪金元帥萬奴之妻萬奴怒走據他部相攻畱哥不直柯特哥遂與有隙至是奏聞帝逮柯特哥來行在柯特哥懼遂與耶斯布等紿眾言畱哥已死殺所遺蒙古三百人以叛事聞帝慰畱哥曰爾毋以失眾爲憂草青馬肥資爾甲兵往取家孳將倍此數以

封汝十一年丙子

丙子金宣宗貞祐四年元克潼關

耶斯布僭稱帝於澄

州國號遼改元天威以雷哥兒獨刺爲平章置百官以金

降將青苟爲元帥方閱月青苟復叛歸於金耶斯布凡僭

號七十餘日爲其下所殺推其丞相乞奴監國與其行元

帥鴉爾分兵民爲左右翼屯開保州關金蓋州守將眾家

奴引兵攻敗之是春雷哥引蒙古軍數千適至得兄獨刺

并妻姚里氏戶三千追敗鴉爾軍還度遼河招撫懿州廣

寧徙居臨潢府乞奴走高麗爲金山所殺金山又自稱國

王改元天德明年丁丑統古與復殺金山而自立又明年

戊寅

戊寅木華黎盡取金河東州郡

咸舍復殺之亦自立是冬雷哥引蒙

古契丹軍及東夏國元帥胡土兵十萬竝約高麗兵共攻

咸舍殺之徙其民於西樓自乙亥歲雷哥北覲後遼東反

覆五載僭立四主至己卯春復爲畱哥平定畱其長子薛  
闍事帝而自歸國明年畱哥卒年五十六子薛闍以下世  
有佐命功

耶律薛闍畱哥之子也初畱哥以遼東歸太祖受封遼王  
畱其子事帝而自歸國會帝征西域畱哥卒於遼東皇太  
弟承制以畱哥妻姚里氏佩虎符權領遼東國事者七年  
丙戌帝還姚里氏攜次子善哥鐵哥永安及從子塔塔爾  
孫收國奴覲帝於河西阿里湫城帝曰健鷹飛不到之地  
爾婦人乃能來邪賜酒慰勞姚里氏奏請長子薛闍歸襲  
父爵以次子善哥代其扈從帝曰薛闍今爲蒙古人矣朕  
征西域時回回圍太子朮赤於合彌城薛闍引千軍救出  
之身中槊又戰回回於蒲華尋思千城傷流矢積功爲拔

都魯曰侍朕左右不可遣當令善哥襲其父爵姚里氏拜且泣曰薛闡者先臣前妻所出嫡子也善哥者婢子所出若立之國人將謂我私己而滅天倫恐無以服下帝歎其賢給驛騎四十從征河西賜河西所俘士馬金幣皆以九計許以薛闡襲遼王爵而畱善哥及弟姪等於行在惟遺其季子永安從姚里氏東歸丁亥詔薛闡曰昔女真國亂爾父起兵遼東會朕師又能割愛以爾事朕遼東變亂爾父連戰討平盡得金國肇基根本之地使朕無東顧憂朕以兄弟視爾父則爾猶吾子爾其與吾弟孛魯古台竝轄遼東軍馬爲第三千戶世世東藩欽哉己丑從太宗南征金有功賜馬牛羊千二百庚寅復命與撒爾台東征收其父遺民移鎮廣寧行廣寧路都元帥府事自庚寅至丁酉

奉太宗命連征高麗東夏國復賜戶六千有奇東夏卽完顏萬奴金舊宗室爲畱哥敗諸東京者也亦據遼東半地自立國號東夏天王與東遼竝峙十九載至是爲元兵所滅戊戌薛閣卒年四十六子收國奴襲遼王爵行廣寧路總管軍民萬戶府事易名石刺征高麗有功辛亥憲宗元年以石刺祖孫三世爲國宣力命更造所佩金虎符賜之佐諸王耶苦及札刺台控制高麗其後子孫襲職亦世有戰功

論曰舊史此傳所述金兵攻遼皆畱哥降元後鋪張夸詡之詞初言太祖起兵朔方金人疑遼民有他志下令遼民每戶以二女眞戶夾居防之畱哥不自安等語攷遼東西地自金章宗世已爲愛王割據連兵十餘年久非金地具

見金史本紀豈自衛紹王末年始疑其遺民防禦之理所

云金人者蓋卽愛王始用遼民以攻宗國繼又疑遼民通

蒙古而防之遂使中隙生變此其敘述不詳者一也又曰

歲壬申遁至隆安韓州糾壯士剽掠其地擊走金兵因與

耶的合勢募兵數月眾至十餘萬推畱哥爲都元帥營帳

百餘里威震遼東金遣胡沙金史完顏承裕一名胡沙帥軍六十萬號

百萬來攻畱哥云云攷壬申歲爲金衛紹王四年元太祖

之七年蒙古已於先年入居庸敗胡沙之兵衛紹王此時

旦夕不自保尙能有六十萬兵攻遼東乎此其虛造者二

也畱哥亟馳請援帝命按陳孛都歡阿魯都罕引千騎會

之與金兵對陳於迪吉海子畱哥以姪安奴爲先鋒橫衝

胡沙軍大破之云云按以六十萬敵眾而援兵止千騎有

是理乎此其情見勢窮者三也八年癸酉眾推留哥爲王以其屬耶斯布爲郡王置丞相元帥等官國號遼九年甲戌金遣使青苟招降不從留青苟不遣金主怒復遣宣撫萬奴領軍四十餘萬來攻留哥逆戰於歸仁縣北河上金兵大潰萬奴收散卒走還東京於是留哥盡有遼東州郡遂都咸平號爲中京金左副元帥耶律都以兵十萬來攻留哥拒戰敗之十年乙亥留哥破東京云云攷甲戌爲金宣宗二年五月燕都被圍數月金請和以衛紹王女歸蒙古請班師夏金徙都汴秋蒙古復圍燕木華黎攻金遼西州郡皆下之此時金國危如累卵都城不暇自顧而能有四十萬眾攻遼東乎況衛紹王本紀三年徒單鑑請置行省事於東京備不虞上謂無故遣大臣動搖人心未幾東



京不守上乃大悔其時遼河東西均已隔絕根本盡失尙有遣宣撫四十萬副元帥十萬攻遼之事乎蓋宣宗曾遣萬奴宣撫遼東而萬奴因自立實有其事惟所稱明年乙亥畱哥破東京者石抹耶先傳以東京爲木華黎襲破在乙亥之前太祖本紀以東京爲哲伯襲破在七年壬申皆與此不合又木華黎傳太祖十年乙亥木華黎用蕭耶先計襲取東京蕭耶先卽石抹耶先十一年木華黎克錦州殺張致廣寧懿州降拔蘇復海三州耶律涅爾傳云進取遼東西廣寧金復海益等十五城咸平宣撫完顏萬奴率眾十餘萬遁入海島蓋萬奴之屢棄東京亦蒙古兵威所震耳而本傳以東京之破廣寧懿州之招撫俱屬之畱哥其不合者四也當日張虛聲異代不知核實於舊史乎何誅

# 高昌

高昌國王世號亦都護卽葉護之轉音華言國王也亦世以的斤爲名華言貴人也其氏曰畏兀爾卽回鶻之音轉也回鶻舊居漠北有和林山二水出焉曰土刺河曰薛靈哥河其先世布可罕以靈異創國傳三十餘君是爲玉倫的斤取雄武數與唐人攻戰唐人苦之議和親以金蓮公主妻其子葛勵的斤故高昌國王有印曰諸天敬護護國第四王之印卽唐所賜回鶻印也和林有山曰騰格里南有石山曰胡圖里蒙古謂天曰騰格里福曰胡圖里蓋言天山福山也唐使與相地者至其國曰和林盛強以有此福山也壞此山則其國可弱乃告諸的斤曰旣爲婚姻將有求於爾其與之乎福山之石於上國無所用而唐人願

見的斤知石山大不能動姑與之唐人焚以烈火沃以醖醋碎其石輦而去國中鳥獸悲號後七日玉倫的斤卒埃異屢見民弗安居傳位者數亡又避黠戛斯之偏乃徙居北庭都護府卽元之別什巴里城也會高昌國微乃併取之而遷於交河卽火州吐魯番也統別什巴里之地北至阿朮河南接酒泉東至兀敦甲石哈西臨西蕃居是者三百餘載而至月僊帖木爾月僊生巴朮阿忒卽亦都護也素臣事西契丹歲己巳聞太祖興朔方遂般契丹所置監國等官欲來附未行帝遣使使其國亦都護大喜卽遣使入奏願率部眾爲臣僕是時帝破蔑爾乞部射殺其酋脫黑脫阿其酋子忽都赤刺溫率所部涉耶爾的石河將奔亦都護先遣使至亦都護斬其使大戰稽河來報捷六年

朝於怯綠連河請爲第四子帝感其言使尙公主序於諸子後從哲伯征哈密算端及回回諸國將部曲萬人以先紀律嚴明所向克捷又從帝征尼沙卜里征西夏皆有功旣卒次子玉古倫赤嗣卒子馬木刺嗣將探馬赤軍萬人從憲宗伐宋合州攻釣魚山有功還火州卒子火赤哈嗣其後子孫世尙公主與元代相終始太祖所收東西各部惟東契丹高昌不煩兵力且世爲國藩焉

火赤哈亦都護之曾孫也世守高昌亦世號亦都護叛王海都之亂畏兀民遭亂解散奉詔撫其民人凡在宗王近戚之境者悉遣還其部至元十二年叛王篤哇及卜思巴等率兵十二萬圍火州聲言曰阿只吉奧魯只諸王以三十萬之眾猶不能抗我而自潰爾敢以孤城當吾鋒乎亦

都護曰吾聞忠臣不事二主吾生以此城爲家死以此城爲墓終不能從爾也受圍凡六月不解篤哇以書繫矢射城中曰我亦太祖皇帝諸孫何以不附我且爾祖嘗尙公主矣能以女與我乎我則休兵火赤哈曰吾豈惜一女而不以救民命乎然吾終不能與之相見以茵厚籍其女縱出之始解去後入朝世祖嘉其忠詔尙定宗女巴哈公主又賜鈔十萬錠以振其民還鎮火州屯於州南哈密之地北軍猝至以兵寡力戰死子紐林尙幼詣闕請兵復讐帝壯其志命尙太宗孫女布魯罕公主公主薨又尙其妹巴卜察公主有詔師出河西俟與北征諸軍齊發遂畱永昌會吐蕃寇亂詔以平章政事領本部探馬赤軍萬人鎮吐蕃威德甚著武宗詔還嗣爲亦都護賜金印仁宗始稽故

實封爲高昌王別賜金印設王府官其王印行諸內郡亦  
都護印則行諸畏兀地復尙安西王女兀刺真郡主延祐  
五年紐林卒子二人長曰帖木補化次曰錢吉帖木補化  
大德中尙闊端大王孫女至大中從父入覲備宿衛又事  
皇太后於東朝領大都護事出爲鞏昌等處都總帥達魯  
花赤奔父喪於永昌讓爵於叔父欽察台不許至治中領  
甘肅諸軍仍治其部泰定中召還與威順王寬徹普化等  
分鎮襄陽俄拜湖廣行省平章政事文宗召至汴以左丞  
相畱守尋入平內難天祿二年拜中書左丞相改御史大  
夫先官湖廣時有左丞忌嫉之後其人有罪當死爲堅請  
釋之人服其雅量子二長曰不荅失里嗣封拜中書平章  
政事次曰伯顏不花官江東廉訪副使死事甚烈見忠義

傳至順二年以帖木補化葬父永昌詔翰林學士虞集撰高昌王世勳之碑帖木補化卒不以爵與其子而讓其弟籤吉襲爵至順三年籤吉卒□太平奴嗣至正十三年高昌王月魯帖木爾卒於南陽軍中子桑哥襲

西夏

西夏唐兀氏自唐賜姓李氏以來世爲節度使有河朔之地居夏州在黃河南至元昊始大乃北渡河城興州而都之其地初有寧夏綏銀宥靈鹽等州其後遂取武威張掖酒泉燉煌郡地南界橫山東距西河土宜三種善水草饒牧畜風氣強梗自漢唐以引水灌渠興水利積穀屯邊故境狹而富強又沿唐代節度鼓吹之遺故聲樂清厲頓挫崇尚儒行尊孔子以帝號文章詞命可觀立國二百餘年

抗宋遼金三國視強弱爲向背其國州郡共二十有二河南之州九曰靈洪銀宥夏石鹽會南威河西之州九曰興定懷永涼甘肅瓜沙河外之州四曰樂廓西寧積石自天會間與金議和八十載無兵革至李遵頊當金主南遷汴京欲用兵宋夏以廣疆土於是構難十年不解精銳皆盡兩國俱敝遂爲元軍所乘太祖卽位四年己巳征之軍至河西夏主遣其子率師來戰敗之獲元帥高令公克兀刺海城俘太傅西壁氏進至克夷門復禽其帥嵬名令公遂薄中興府西夏國都也引河灌之隄決水外潰遂解圍還遣太傅訛荅入中興招諭夏主納女請和班師自是九載專事於金及十三年戊寅帝以攻金事專任木華黎遂自將伐夏圍王城夏主遵頊畱其子居守而自奔西涼會明



年西域回部殺使者大軍西征乃允夏講和於是夏國無事者八載初帝征西域時夏主請和且言願出軍爲右翼及我師西行徵夏兵夏臣阿沙敢布曰俟大國軍敗時我再出兵太祖大怒曰候我破回回歸再滅爾國及自西域還以西夏納叛亡不遣質子乃於二十一年丙戌春自將復征之先破其將阿沙敢布於賀蘭山取黑水等城夏取甘肅等州秋取西涼府朔羅河羅等縣遂踰沙陀至黃河九渡言細水河也取應里等縣進攻靈州夏遣鬼名令公來援帝渡河擊敗之二十二年丁亥畱兵攻夏王城而自率師渡河攻積石州破臨洮府洮河西寧二州下信都府拔德順等州時帝避暑六盤山夏主李睨請降獻金銀器男女駝馬等皆以九爲數帝以其勢蹙始降誅之逾月而帝崩

夏滅而金亦垂亡矣至高麗則太祖十三年以契丹人金山元帥六哥等竄入其國據江東城帝遣哈只吉及札刺等征之連下十餘城高麗懼請降納質子其後叛服不一太宗憲宗朝屢用兵至世祖而後臣服世尙公主別詳高

麗傳

本宋史及元祕史

西契丹

北印度欽察各國

西契丹世號爲西遼其先耶律大石者遼太祖阿保機八世孫也女眞覆遼大石率所部西去沿途收集士馬歷北庭回鶻踰蔥嶺敗西域諸國兵駐軍尋思千城建西都曰河中府歲乙巳二月從臣冊立大石爲帝遼史天祚紀以大石稱帝於甲辰二月今從續通鑑改元延慶時金太宗天會二年宋徽宗宣和七年也越二載復還師東度蔥嶺得善地於阿里馬之西建

都城曰虎思斡耳朵

長春西遊記自阿里馬西行十餘日

里馬一作阿力

至回紇小城卽大石林牙舊都也阿

麻里今伊犁

西契丹盛時兼制畏吾部遣官監其國勢驕甚畏吾王亦都護久患之聞太祖興於和林遂與其臣下議殺契丹監國官吏而朝貢於蒙古於是天山北路及東路回鶻畏吾之地盡歸太祖其蔥嶺以西各回回國爲蔑里吉及乃滿兩部遺孽所煽太祖旣合速不台追擊竝招其降而南路回回西契丹國爲秦陽汗子屈出律所據殺我使臣太祖怒而親征之十四年己卯命皇弟斡赤斤居守和林其山北之兵太祖自將之由回鶻五城葉密里地

卽今伊犁

直走蔥

嶺以西其山南之兵諸皇子朮赤察合台窩闊台等分將之由山南之于闐而至莎車爲一路歷克養吉干城巴爾

眞城玉龍傑赤城

今作王龍哈什  
卽和闐河也

馬魯察城葉爾羌城烏

什城皇四子拖雷等由山南之龜茲溫宿故地沿河而至

疏勒爲一路歷克徒思尼城察兀爾城還掠木刺夷國度

朔朔闌河克耶里等城大將哲伯從諸皇子爲先鋒用西

遼降將曷思麥里爲鄉道斬乃滿酋屈出律持其首徇各

地若可什哈爾城

卽今喀什噶爾

押爾牽城幹端城

幹端卽于闐

皆望

風降遂至蔥嶺西與帝軍會凡征回回國七年還至土刺

河黑林舊營明年遂征唐兀部卽西夏也是皆太祖征蔥

嶺以東回國之事

據元祕史及遼史天  
祥紀及太祖本紀

其蔥嶺以西各國

則太祖自將征之而以哲伯爲前鋒速不台繼之脫忽察

爾又繼之令所過毋攻城毋虜掠徑走國都俟太祖大軍

至夾攻其域有阿木大河徑中央

阿木河一作阿母河一  
作暗木河卽唐書之縛

契丹原出蔥嶺一東流入蒲昌海重出爲中國黃河一西流爲阿母河一入印度爲恆河

印度西北爲幹羅思爲欽察爲康里幹羅思在太和嶺之

西南近裏海欽察在太和嶺之北近北海而康里則欽察

之別部寬甸吉思海在焉阿速則在幹羅思之東攻幹羅

思兵出入必由之十四年取阿荅刺城禽其酋

訛達刺城在尋思千東千餘里十五年克蒲華城

地里志作胡瓦耳在尋思千西六七百里思千城

前見幹脫羅爾城

地里志作羅耳十六年攻卜哈爾城

明史作卜花爾即今之布噶爾國在敖罕西此皆西契丹國在阿木河以北之城也

又踰河西南克班勒紇城

長春西游記有班里城在鐵門及阿母河之南近大雪山北印度邊

境 回國主札闌丁出奔與蔑里吉汗合兵拒戰

此回國主非西契丹當是北印度國因蔑里吉遺酋西奔投其國故合兵拒太祖太祖兵佯卻誘之而速不台哲伯等兵夾攻其後破回回兵三十餘萬走至申

河即印溺死殆盡惟札刺丁及蔑里吉二酋沿河西遁太

祖自取兀都刺各城於阿勒壇廓爾山過夏

此北印度之大雪山命

速不台哲伯等窮追二酋竝征迤北之康里欽察阿羅思

阿速等部及迤南之客什米爾孛刺爾等部共有十一部

渡亦的河札牙河連克各城立答魯合赤探馬赤等官而

後班師

答魯合赤即答魯花赤也

十七年辛巳北印度可弗義國算端

算端者西域君長之稱猶合罕也

乘大軍東歸引兵襲據尋思千城復取

西契丹故地帝回軍討之算端聞大軍將至棄城走鐵門

屯大雪山帝遣郭寶玉追之遂奔印度乃命耶律楚材鎮

守尋思千城而自率大軍南出鐵門踰阿木河至大雪山

谷中雪深二丈詔致禱祭封昆侖山爲玄極王大鹽池爲

惠濟王其山頂天池東注中國爲黃河西注鹹海爲阿木

河注西南海爲印度河山多產玉故國人呼蔥嶺爲昆侖

昆侖者大山橫嶂之名遠望鬱蔥者也時帝兵已至北印

度收服阿里部土伯特人眾致書於大刺麻其古魯格多

爾濟汗遣使獻駝馬輜重無算將進征額納特珂克

卽中印度

甫抵齊塔納凌嶺

凌嶺猶言冰嶺此北印度之雪山

遇獨角獸名曰塞魯

奔至帝前屈膝而叩曰人主宜早還帝知上天示意遂振

旅阿速國者在尋思千城西北阿羅思在阿速之北欽察

國又在阿羅思之北欽察之先世曲出生梭末納至亦納

思世爲欽察國主去中國二萬餘里夏夜極短日暫滅卽

出冬夜極長人皆蟄處土室時蔑里吉酋奔欽察欽察酋

亦納思一名玉里吉其子忽魯速蠻一名塔塔哈爾

酋長有名

亦有號猶高昌王阿朮巴特之號亦都護也且國王止一人若非父子竝舉何得言其酋玉里吉及塔塔哈爾豈一

國二王乎明即亦納思父子明矣元史兵志有康里軍何以獨無討康里之事其爲欽察別部之入赤蠻明矣康里之於欽察猶耽羅之於高麗占城之於安南一而二二而一者也太祖遣使諭之曰汝奚

匿吾負矢之麋不相還者禍且及汝亦納思曰逃鷓之雀叢薄猶能生之吾願不如草木邪太祖命速不台哲伯討之及於輝里河人蒸三炬以張聲勢蔑里吉酋宵遁沙磧速不台復畱輜重簡精銳萬騎由布罕川必里罕城追入沙磧無水草地先發千人爲前鋒繼以大軍晝夜兼進蔑里吉酋已遁入海盡獲其輜重珍寶來獻遂進討欽察引兵繞寬甸吉思海轉至太和嶺鑿山開道出其不意時亦納思已老國中大亂其子忽魯速蠻遣使自歸於太祖而速不台軍已叩其境遇其酋長父子舊史作酋長玉里吉及塔塔哈爾即亦納思父子別名也蓋國人於其酋平日止稱其方聚兵於布

號及降表則當稱名故前後參差史不明析



租河奮擊潰之又破諸阿里吉河忽魯速蠻之子班都察  
舉族迎降遂收其全境略阿速部而還詔封駙馬不賽因  
於尋思千城鎮守之設阿木河行尙書省以總控西域又  
取數國壯士置爲禁旅故元世有欽察軍康里軍阿速軍  
阿羅思軍是皆太祖初并蔥嶺以西各國之事其太宗憲  
宗屢朝征服者別詳於後

據本紀及速不台傳及劉郁西使記長春西游記

元史卷十八

西域

太宗六年蕩平金國七年復命諸王拔都皇子貴由皇姪蒙哥等征西域時欽察已平而欽察別部曰康里者古康居國也其酋巴赤蠻有膽勇恃險遠聚眾自保皇子乃命速不台爲先鋒屢戰破之巴赤蠻逃入寬甸吉思海島九年王師追至其地適大風刮海水去其港可涉士馬遂濟禽其酋命之跪不屈曰我爲一國主豈苟求生且身非駝何以跪爲乃命囚之巴赤蠻謂守者曰我之竄入海與魚何異然海水淺落以濟追師天也今水回溜將至軍宜早還蒙哥聞之卽班師而水已至後軍有浮渡者於是康里

部悉平十年諸王復征斡羅思部至耶烈贊城大戰七日  
 拔之十一年冬兵至阿速蔑怯思城負固久不下明年春  
 昔里紺卜率死士十人樹雲梯先登拔之又明年班師憲  
 宗三年括斡羅思阿速戶口七年以駙馬刺真之子乞台  
 為達魯花赤鎮守斡羅思阿速自是三國始入版圖設官  
 吏以其地封太祖長子朮赤大王建庭於斡羅思別詳諸  
 王傳此皆蔥嶺西北之國也錢大昕曰元初征西域斡察  
 事本紀與地理志及速不台  
土圖哈二傳互異攷斡察酋亦納思父子為一部巴赤蠻  
 為一部本是二國一據寬甸吉思海在太和嶺之東北一  
 近北海在太和嶺之西北近北海者為斡察是太祖癸未  
 所平近寬甸吉思海者為康里國之巴赤蠻是太宗乙未  
 丁酉命憲宗所平相去十五年自舊史土圖哈傳沿虞集  
 句容郡王世續碑之誤合兩事為一事謂斡察酋亦納思  
 之子方納款於太祖而憲宗師已叩其境不知太祖癸未  
 年憲宗方十六歲初無奉命遠征之事乎案錢氏說是而  
 未知巴赤蠻之為康里國以人名為國名是以  
 稍疏舊史以康里為高車國亦誤今竝正之

其蔥嶺西

南之國則自太祖追北印度若弗义算端走死申河外至  
憲宗二年詔皇弟旭烈王西征明年至木乃奚國其國塹  
道置毒水中王遣大將郭侃破其兵五萬所屬山城三百  
六十皆下六年至乞都卜城城在檐寒山上懸梯上下仰  
視之帽爲墜王師築塹圍之久弗克乃架礮攻之諸道竝  
進兀魯算端開門迎降其父尙據西城王遣郭侃攻之七  
日而陷走據東城復破禽之木乃奚國在西域取凶悍多  
養刺客爲窟室置美女供之言能刺仇國酋長者卽生天  
享此福所害無算威讐鄰國四十餘年至是始滅誅之無  
遺類金寶山積帶有值銀千笏者七年又西破兀里城阿  
刺丁城又至乞石迷部卽今克什  
爾爾國皆降其酋其僧儀狀甚  
古如世所繪達摩像日僅一食語皆禪定此北印度國也

遂西至報達國南北二千里方八千里傳四十二世勝兵數十萬其王曰哈里發爲西印度大國有東西二城夾印度河西城無壁壘東城固之以甃郭侃先造浮梁河中以扼其吭破其兵七萬於西城又攻破東城哈里發登舸將遜浮梁扼之獲焉盡拔三百餘城其國富庶爲西域冠殿宇皆沈檀烏木火之香聞數十里殿壁皆黑白玉有七十二弦琵琶五尺珊瑚鐙檠大珠瑟瑟金剛鑽不可勝計有大鳥駝蹏高丈餘能負重行遠卽漢之安息大馬爵又西行三千餘里至天方國是爲回教祖國其聖祖派罕巴爾所葬也經典甚眾一戰破之算端降下其城百有八十五又西行三千里至密昔爾國降其酋距報達六千餘里西印度極邊矣國西卽海海中有富浪國

周伯琦近光集順帝至正三年西域

拂取國貢天馬高八尺三寸修如其數而加半色驪而蹏  
白曲項昂首神駿超越馭者其國人黃須碧眼窄衣凡七  
渡海洋始達中國命工畫之而直學士揭傒斯爲之贊焉婦人衣冠如世所繪菩薩狀  
男子僧服皆好善寢不去衣雖夫婦常異處八年郭侃渡  
海取之旭烈班師而東所經皆中印度地望風迎降勢如  
破竹至石羅子國降其酋奧思阿塔卑算端遂至中印度  
國軍民千二百萬戶國都懸大鐘有詆冤者擊之司鐘者  
紀其事王宮亦紀其名以防奸欺民以蒲爲屋夏暑人處  
水中九年七月至兀林國阿必丁算端來降得大小城百  
有二十民百有七十萬又南至乞里灣國其王忽都馬丁  
甚賢亦來降其拔里寺大城產師子孔雀香貓鸚鵡有風  
馳急使乘之曰可千里此皆中印度境封旭烈王鎮其地  
其南東二印度則兵未暇及云

據本紀及郭寶玉傳劉郁西使記

論曰自生民以來黷武莫如元疆域恢廓亦莫如元屬賓  
身毒安息條支等國漢唐但譯使及之從未服以兵力而  
阿速幹羅思欽察康里竝譯使亦未通而元之取西域也  
則更在取中原之先其分藩也直等諸郡縣之列舊史地  
里志外國傳均不列載遂令讀史者茫然莫得其方向故  
牻臚其形勢冠於各列傳之前以爲全書之綱領其世祖  
時招徠俱藍馬八兒等國更在西印度之西而非兵力所  
取則等諸貢市外國其征瓜哇旋得旋失則同諸日本故  
均不及之云或謂太祖初年方南向爭中原何不先并吞  
金夏而乃分兵力於西荒不知是時乃滿遺種屈出律梟  
雄方篡西契丹據西域殺使臣若火始燄使太祖少遲延  
之必且舉兵東恢漠北舊部蒙古且失其根本故太祖西

征非征回鶻也征乃滿遺孽也而屈出律復聯合蔥嶺以西諸國南北奔竄株連瓜蔓十餘載金得延喘其閒而元域遂西窮海表烏乎幸中之不幸不幸中之幸豈非天哉舊史不言印度所封何藩惟許有壬至正集西域使者哈只哈心碑云世隸旭烈王麾下而旭烈王藩封在極西絕域距中朝絕遠則印度固旭烈王所國平其地者食其封固酬庸之通典也

### 西域藩封

不賽因太祖之駙馬也太祖太宗蕩平西域盡以諸王駙馬分藩其地易前代國名以蒙古語次子察合台則泊蔥嶺以東天山以南建庭於葉爾羌而分封其子孫於幹端喀什哈爾吐魯番地語詳太祖諸子傳其蔥嶺以西則設



阿木河行尙書省以控其中樞阿木河以南爲駙馬篤來

帖木爾封地所謂巴達哈山漢時屬賓國也阿木河以北

則爲駙馬不賽因封地建庭於尋思千城卽西契丹舊都

漢時大宛國是也由阿木河北而再北則爲朮赤大王所

封之阿羅思國由印度河而再西南則爲旭烈大王所封

之印度國自至元後世祖以嶺西遼闊鞭長莫及廢阿木

河行省而篤來駙馬後人與旭烈宗王之後人皆式微無

所表見文宗至順二年西域諸王禿列帖木爾遣使獻馬及蒲萄酒禿列卽篤來之音轉也此外不見於史

惟不賽因之孫賽馬爾罕特聞一作撒馬爾罕一作賽馬爾罕一作達美爾蘭皆譯

音之賽馬爾據尋思千城傍納林河雄勝膏沃西南蕃貨

所走集居民稠密人物秀好有園林池沼之勝耶律湛然

西域尋思虔城尋思肥也虔城也謂肥城也風俗家家有園園必成趣多有方池員沼城中有西戎梭里檀故宮

國富兵強賽馬爾亦雄武能用其眾東有沙鹿海牙部達什千部賽藍部養夷部西有渴石部迭里迷部東西三千餘里兼古大宛大夏之地元末其孫駙馬帖木爾者又取西南三千餘里之哈烈國卽報達國之哈里發王地也以封其子沙哈魯國益富強然世世仍襲其祖賽馬爾罕之號元亡明洪武初帖木爾遣使貢駝馬卽以賽馬爾罕爲國名永樂初遣使至其國帖木爾令人導使徧歷諸國數萬里以夸其國廣大而哈烈酋沙哈魯亦遣使入貢詔序於諸國貢使之首其後又南并五印度而徙都之威震南海帖木爾死孫哈里嗣哈烈酋之兒子也二人不相能構兵又各以國分封子弟嘉靖二年賽馬爾入貢稱王者至二十七人嘉靖十三年入貢稱王者至五十三人四分五

裂惟其汗尙據五印度地至 國朝遂爲西洋夷所有據本

紀及明史及本朝西域圖志

元史不志西域亦不傳西藩無得而稽焉所幸各國傳世至明尙存不與元祚俱燼故明史尙存其梗概迄近日而寶馬爾罕所據之五印度地盡爲西洋所有故馬禮遜外國史略瑪吉思思地理備攷其述蒙古印度始末又詳於明史今附書於後曰寶馬爾罕古城在哈薩克國之中央本韃靼游牧國也奉回教其都曰普加拉城一作破地勢高於裏海百二十丈海外各商雲集城東四十里卽寶馬爾罕城居民萬口多古蹟其都城之東北曰哥干城卽敖罕也一作浩罕古小國與峩羅斯通市民務農桑引河灌田其南方巴勒之地亦有古城與甲布國接界甚暑多瘴尹土土城

在亞母河之南

卽阿母河

山谷間甚燥熱居民尠少與其鄰國

補荅山戰

卽巴達克山國

盡有其地產紅玉青金其南尙有巴黑

坦地界葉爾羌中間高於裏海三十丈山阿盛夏有雪氣

候甚寒哈薩克國卽賽馬爾罕苗裔游牧蔥嶺裏海之間

氈帳遷徙無定處冬則近城邑地產良馬其奔如電南宋

時蒙古青吉汗起漠北踰蔥嶺駐軍尋思千城北服義羅

斯南吞報達加治彌耳

卽宋史迦涅彌勒國今作克什米爾

及印度各國封

其壻不賽因於尋思千城爲王駐阿母河西北以遙制之

於諸國僅羈縻而已至元末明初有賽馬爾罕嗣立人甚

英武患土爾其國之強侵據白西亞地賽馬爾罕興師而

南一戰禽土耳其汗恢復白西亞諸國震慄戰無不克至

其子孫遂南并五印度世世以賽馬爾罕爲號白西亞回

國者古之波斯元史所謂報達國明史所謂哈烈國也

西白

卽波斯二字音轉一作百爾西亞亦呼作報達亦作包社亦作高奢

北界裏海及哈薩克

羅斯袤四千餘里廣約三千里唐以後爲天方回教所據及元初攻破之未置官吏故未全入版圖至洪武初賽馬爾罕盡陷諸城先後隸蒙古者百二十六載及正德間復爲土耳其國所據加治彌耳國者在烏斯藏之西南本北印度地其都曰拉合城在廣谷中四面皆山高於裏海五百八十丈所環之峯取高者千七百丈冬夏積雪不消河流縱橫乃印度五支江所派也物產蕃富甲於諸國居民八十萬與後藏通市昔大蒙古之君每夏駐此避暑爲西域名勝地地富而險自古鄰敵無能攻伐奈國主酷待其民故爲西刻國所有五印度者自昔佛國南宋初始爲白

西亞回國侵據勒其民改回教毀佛菩薩像不從者死元初用兵破之旋爲土爾其國侵據明建文間賽馬爾罕之

孫曰諦母爾

卽帖木爾三字

者吞并五印度各國徙都於東印度

之榜甲拉西北

榜甲拉卽東印度一作榜噶拉一作孟加臘

創立大蒙古之號

威行五印度其都曰亞甲城其國方員廣袤七萬餘里居民四百萬歲收賦餉銀二萬二千四百萬兩各國皆景仰焉是時西洋之布路亞國荷蘭國佛蘭西國英吉利國皆據南海之錫蘭山島并於東南二印度海口通市然必奉大蒙古之令震威南海其後諸子爭立內亂竝起各部酋長乘間自王其地遂四分五裂其所都之亞甲部在榜甲拉西北廣袤方員四千一百八十里居民二十餘萬口當諸河下游望西南其山漸高西方多牧場天氣與中國吳

越無異居民壯健產麥多猛獸東連榜甲拉西南抵網買  
及列酋部境北爲雪山及加治彌爾界此地爲印度之聖  
域多大蒙古故蹟亞甲都城居民六萬口在恆額河閩郡  
河會匯之處其河曰聖河每年自遠方至敬佛者不下十  
萬爭向恆額河浴身有傍河之比勒城亦聖域也四方雲  
集焚香婆羅門僧多若蜂聚街狹人稠約二十餘萬回回  
居五之一與土民分黨不居城內亞甲城內多蒙古宮殿  
大蹟有王后之陵甚壯麗又有德希城亦大蒙古故都也  
蒙古王苗裔在此居民十五萬自乾隆間印度蒙古王與  
英吉利商肇衅又聯佛蘭西荷蘭兵船合力拒英軍英軍  
駛入恆額河與蒙古鏖戰大勝盡驅佛蘭西駐印度之兵  
始奪榜甲拉之地調兵帥統轄東南印度與蒙古王分治

既而大蒙古日微內外怨叛於是嘉慶間英軍入其都竝  
討平北印度西刻王加治彌耳之地遂總理五印度而蒙  
古德希城之王窮窶無聊反賴英國俸祿周濟以此知大  
國之不足恃焉計自元太祖初平西域至今隸蒙古賽馬  
爾罕者五百餘載云又案黃潛海運千戶楊君墓志曰君  
諱樞大德五年君年甫十九致用院僧以官本船浮海至  
西洋遇親王合贊所遣使臣那懷等如京師遂載之以來  
那懷等朝貢畢請仍以君護送西還丞相哈刺合孫如其  
請奏授海運副千戶佩金符以行八年發京師十一年乃  
至其登陸處曰忽魯模思云是役也君往來長風巨浪之  
中歷五星霜凡舟楫糗糧器物一切不以煩有司又用私  
錢市其土物白馬黑犬琥珀蒲萄酒蕃鹽之屬以進

以上  
碑志



攷舊史本紀大德八年七月諸王合贊自西域遣使來貢  
卽其事也惟此地僅今印度之境洋艘往返數月可至而  
彼時延至數載豈海道之習舟楫之技不如後世亦或市  
易稽其時日乎

地里志西北地附錄有忽里模  
子蓋卽忽魯模思之音轉云

### 大理

舊史於世祖征大理事初不載其構兵之由近世顧祖禹  
方輿紀要謂古今用兵地利形勢有定惟蒙古憑虬出奇  
變化不測於南宋未服兵未渡江先從烏斯藏邊界遶江  
源上游南取大理旋師湖南以出荆鄂之背爲天降之師  
烏乎元之用兵未有拙於大理之役者也大理距蒙古萬  
里無構釁之由遶蜀逾滇黔蠶叢不毛皆宋所斧畫棄地  
無可乘之利以漠北寒鄉土馬趨炎瘴不服水土死者數

十萬且元兵兩次皆由蜀返秦其三次雖至湖南亦已強弩之末無預夾攻之利元之取宋以得襄陽不以得大理也以此毒天下而爭利其不爲漢之大宛後之日本者幾希不但此也憲宗攻蜀之役原欲從上游以攻宋乃頓兵合州釣魚山逾年而不能克世祖之攻襄陽原欲奪江漢之險乃力攻三載因賈似道不遣一旅之援而後降使似道親援襄陽不知何時可破元兵如果出奇者西蜀之師何不舍合州勿攻盡斂內江水師戰艦於春水盛時順流東下直抵鄂州又以一軍由漢中造船乘漢水直下過襄陽勿攻亦直抵鄂一循北岸取江陵潭州以據其上游一循北岸取建康直擣吳越則不俟師至臨安而降旗已豎矣何至經年累歲頓兵堅城之下哉再者襄陽事急時宋

人金履祥曾進策并圖請以重兵由海道直擣天津撼燕京則襄樊之圍自解似道不用及伯顏入臨安得其圖及策遂奏於朝招海盜朱清張瑄等試行海運遂開有元一代海漕之路其後歲至京師糧三百萬石使當日移日本之師由海道入南洋一入揚子江以取建康一入錢唐江直擣臨安則王師自天而降不但賢大理之勞拙萬倍卽視合州襄陽之老師亦百倍況委十萬赤子於鯨鯢之窟者乎以此決之而謂蒙古用兵爲善出奇吾未之信也大

理旣列版圖舊史不入外國傳至令讀史夢夢故撮敘於元初削平諸國之後大理本漢滇國至唐兼并六詔蒙氏據之傳十三王二百四十七年石晉時又滅於段氏傳二十王三百有十六年宋太祖平蜀視地圖以玉斧畫大

渡河曰此外非吾有也故終宋世未嘗南略憲宗卽位之元年銳志圖宋以宋人堅守蜀荆襄鄂兩淮爲北面藩蔽思出奇繞道西南攻其腹背且繞出江源上游使失天塹之險次年壬子七月卽命皇弟忽必烈禡牙西征三年癸丑秋師出臨洮六盤山踰吐蕃經行劍外二千餘里所謂梁州外境也其國分三蠻部烏蠻在滇東白蠻在滇西鬼蠻爲黔地在滇東北議分三道進大將兀良合台率兵出西道由麗江入諸王抄合耶只烈帥東道兵由四川曲靖入皇弟督中道由越巂入至滿陀城畱輜重冬十月皇弟軍過大渡河又經行山谷二千餘里至金沙江大理兵嚴守江岸乃出不意以革囊及楸濟師摩些二部酋迎降其地在大理北四百餘里十一

遣使招諭大理時大理方

睦於宋殺我三使兀良合台分兵入察罕章白蠻先後降  
數城十二月皇弟兵由龍首關進薄大理城城倚點蒼山  
西洱河爲固三面皆水國王段智興一作段興智背城迎戰大  
敗又使招之三反弗聽下令攻之東西兩道兵皆會乃登  
點蒼山俯視城中城中宵潰智興奔善闡兵入其城秋毫  
不犯惟烏蠻善闡未服留兀良合台經略之四年甲寅復  
由大渡河回至六盤山未能取道湖南也兀良合台進攻  
烏蠻合刺章先拔其水城前次羅部府遂進至烏蠻所都  
押赤城卽善闡也城際滇池亦三面阻水屢戰破之禽其  
王段智興兀良合台病委軍事於其子阿朮五年乙卯連  
破乾德哥城赤徒哥山寨又擊破魯斯國之塔渾城忽蘭  
城阿伯國之阿魯山城盡請降凡出師二年平大理五城

八府四郡泊烏白等蠻二十七部遂以便宜取道出烏蒙  
趨瀘江卻宋將張都統兵三萬奪其船二百艘遂通道於  
嘉定重慶濟蜀江與大軍會七年丁巳以雲南平獻捷於  
朝遂經六盤山至臨洮府大營月餘復奉詔西征烏蠻仍  
未能取道湖南也是冬進兵征交趾先是大理國王段氏  
屢爲權臣高氏所廢至是誅其相高祥一作高素祥使段智興  
主國事智興父子自率爨焚兵二萬爲先鋒導大軍討平  
未服諸部進攻交趾於是國主陳日昷內附還軍雲南之  
押赤城時世祖方奉憲宗命伐宋詔交趾軍以明年正月  
會長沙南北夾攻乃引兵入宋境所經炎瘴軍士多病乃  
率四王騎兵三千蠻焚萬人破橫山寨關老蒼關徇宋內  
地破其兵六萬一軍由廣南至衡州一軍歷邕桂辰沅至

潭州城下潭州出兵二十萬斷我歸路我軍邀其前後夾擊大破之自入宋境轉鬪數千里大小十三戰未嘗敗北壁潭城下月餘會世祖兵已渡江攻鄂遣兵二千來援遂北渡與大軍合先是蒙古兵出靈關羅施鬼國卽遣報宋思播守臣言蒙古有事大理實欲取道西南大入中國當豫爲之備守臣以聞宋廷臣皆言蒙古生長朔方專恃馬騎冬枯夏暑便當反北安能崎嶇岡嶺久涉炎方仰攻荆楚事涉迂誣不之信旣而南軍果至始大駭懼然元於大理之役首尾往返七載土馬死者數十萬師始得至湖南而世祖旋班師北歸究不遂擣宋之願董文炳率四十六騎從征中途死盡至吐蕃僅餘兩人挾之徒行路食死馬肉展轉萬山中日不能三十里會使者遇之還言於世祖

遣其弟文忠馳迎乃達雲南一人如是餘可例知其後遂世遣皇子分封鎮守雲南與段氏分治分大理國爲南北中三路大德七年從雲南守臣請立碑點蒼山以昭世祖功德以大理善闡二城皆三面際水故親王國善闡而段氏世鎮大理一恃宗親一恃故物兩不相下中葉亦屢構兵事見各傳初雲南王始封之印曰建昌王印建昌卽雲南之別稱也中統二年金齒蠻來貢地在大理西南數千里外國名百夷乃羣蠻總稱也眉額塗丹墨而金其齒意思野逸如驚鷹然語言重譯而後通命草詔宣諭大理及合刺章俾還故土又手詔曰嘉汝等遠自雲南導從選鋒轉戰千里以達鄂渚蓋猶敘其初年開路南伐之功云

據本

紀及宋史及兀良  
合台董文炳各傳



元史卷十八

列傳

三

○太祖太宗憲宗屢朝征西域平大理其時蔥嶺以西置  
阿木河行省又建行省雲南開郡縣視同內地并非羈縻  
蠻荒比邵氏類編以西域與大理載之高麗日本安南占  
城瓜哇間等之外國疏矣今既立平服西域大理各傳以  
段氏世官大理略取其世系附注傳末段氏自智興後皆  
效忠於元世為大理總管智興卒族弟實曰信其日者世  
祖朝襲為總管進大理威楚金齒等處宣慰使都元帥拜  
雲南行省參政自有傳實卒弟忠襲從伐西林破會昌通  
善闡平休林武定緬甸有功忠卒實子慶襲先是至元闕  
慶從父入朝宿衛東宮尙公主後歸授大理金齒等處宣  
慰使都元帥慶卒忠子正襲正卒慶子隆襲隆卒俊與義  
相繼襲職二代世系未詳義卒隆子光襲時雲南王府諸  
人多驕恣凌虐段氏漸構成隙武宗至大間諸王老的罕  
出鎮雲南用擊下議率眾西向光迎戰而敗慮王襲之遣  
重兵守羅那關防猜不解順帝至正四年光弟功襲二十  
四年明玉珍據蜀分兵兩道攻雲南梁王把匝剌玉珍屯  
走威楚徵兵救援功進兵呂關破蜀兵於關灘明玉珍屯  
古田寺功夜遣人火之蜀兵死者十八九復大破之於回  
磴關玉珍收兵歸又追敗之於七星關玉珍走還重慶梁  
王深德功妻以女奏授雲南平章已而忌其威望復害之  
功子寶襲蜀兵復侵善闡梁王力不支復遣使詣大理求  
援寶以父仇卒不出兵迄明祖定江南遣其叔段真由會  
川通款於明云

元史卷十八終

元史卷十八 列傳

元史卷十八終